

दिनांक : 12.03.2026

समय : 18.45 बजे

- राष्ट्रपति द्रौपदी मुर्मू कृषि-खाद्य प्रणालियां मांय काम कर रही महिलावां री अगुवाई ने बधावो देवण माथे ज़ोर दीनों
- प्रदेश मांय आरटीई रा तैत गैर-सरकारी स्कूलां मांय मुफ्त भणार्ई बाबत् दाखिला सारू आज लॉटरी निकाळी ज्यी-पहला दौर रो स्कूल आवंटन 17 मार्च ने व्हेलां
- प्रधानमंत्री नरेन्द्र मोदी रो काल असम रा गुवाहाटी ऊं पीएम किसान सम्मान निधि री 22वीं किश्त जारी करण रो कार्यक्रमं
- प्रदेश मांय पारो सामान्य ऊं 5 ऊं 7 डिग्री सेल्सियस ऊंचो दर्ज कर्यो जा रह्यो है-घणखर टौडां दिन री बगत तापमान 35 ऊं 40 डिग्री सेल्सियस बीचे चाल रह्यो हैं

000

राष्ट्रपति द्रौपदी मुर्मू खेती-बाड़ी ऊं जुड़ी खाद्य प्रणालियां मांय काम कर रही महिलावां री अगुवाई ने बधावो देवण सारू कह्यो हैं राष्ट्रपति आज नई दिल्ली मांय कृषि-खाद्य प्रणाली 2026 में महिलाओं की भूमिका मुद्दा माथे राख्यी ज्यी वैश्विक सम्मेलन रा उद्घाटन रे मौके बोल रही हीं राष्ट्रपति कह्यो के भारत महिलावां री अगुवाई मांय विकास री नीति अपनार्ई हैं राष्ट्रपति कह्यो के खेती-बाड़ी रा हलका मांय हर लेवल माथे महिलावां री बत्ती भागीदारी ऊं खेती-बाड़ी रा विकास ने बधावो मिलेलां

.....

तीन दिन रा ई सम्मेलन मांय महिला किसान मंच अर युवा मंच समेत केई खास मंच ऊं जुड़्या कार्यक्रम राख्या जा रह्या हैं

000

लोकसभा अध्यक्ष ओम बिरला कह्यो है के वे हमेशा सदन री कार्यवाही निपख तौर ऊं, अनुशासन सागे, संतुलन अर नियमां रे मुजब चलावण री कोशिश कीनी हैं विपख कानी ऊं वां ने सदन ऊं काड देवण री मांग वाळा प्रस्ताव माथे बिरला कह्यो के वे सगळां री मदद ऊं भाईचारो बणायो राखता थकां व्यवस्था अर दक्षता कायम राख र जिम्मेदारी पूरी कीनी हैं लोकसभा अध्यक्ष कह्यो के वे हमेशा सदन रा मान, मर्यादा अर प्रतिष्ठा लगातार बणायी राखण अर सगळा सदस्यां ने ज़रूरी मौका देवण री कोशिश कीनी हैं

000

मुख्यमंत्री भजनलाल शर्मा कह्यो है के राज्य सरकार प्रदेश मांय उद्योगां सारू बेहतर माहौल बणावण बाबत् लगातार काम कर रही हैं वे आज भारतीय उद्योग परिसंघ-सीआईआई राजस्थान रा वार्षिक सत्र मांय बोल रह्या हां मुख्यमंत्री कह्यो के विकसित राजस्थान 2047 री सोच सागे प्रदेश रा पूरा विकास रो मजमून तैयार कर्यो जा रह्यो हैं श्री शर्मा कह्यो के राजस्थान मांय निवेश करण वाळा कारोबारियां ने किंण ई भांत री परेशानी नी व्हेलां वे नौजवानां ऊं स्टार्टअप अर खुद रे काम-धंधा रे मार्फत दूजां ने नौकरी देवण वाळा बणबा री अपील कीनीं

.....

कार्यक्रम मांय मुख्यमंत्री नौजवानां ने गैर-सरकारी हलका मांय नौकरी लागण रा कागजात अर महिलावां ने खुद रा काम धंधा सारू वाउचर ई दीनां वे आज वां रा दफ्तर मांय राज्य मांय केन्द्र सरकार री मदद ऊं चलायी जा रही योजनावां रा तैत कराया जा रह्या कामां रो ई जायजो लीनो अर अहलकारां ने ज़रूरी हुकम दीनां

000

शिक्षा मंत्री मदन दिलावर आज पाली ऊं वीडियो कॉन्फ्रेंसिंग रे जरिये शिक्षा का अधिकार-आरटीई रा तैत गैर-सरकारी स्कूलां मांय मुफ्त पढ़ार्ई सारू दाखिला बाबत् राज्य स्तर री लॉटरी निकाळीं ई मौके शिक्षामंत्री कह्यो के राज्य सरकार हर बच्चा तांई बराबर मौका अर गुणवत्ता वाळी भणार्ई-लिखाई रो फायदो पूगावण सारू पूरा मन ऊं काम कर रही हैं दिलावर कह्यो के लॉटरी रो काम पूरी साफ-गोई

सागे करी ज्यो हैं ज्यां बच्चां रो नम्बर आयो है, वां री लिस्ट संबंध्यित पोर्टल माथे देखी जा सके हैं ध्यानजोग है के ई दफा सवा 6 लाख ऊं बत्ता विद्यार्थी मुफ्त दाखिला सारु अर्जी दीनी हीं विद्यार्थियां रा मायत 16 मार्च ताई स्कूल चयन क्रम मांय बदलाव कर सके हैं 17 मार्च ने पहला अर 7 अप्रैल ने दूजा दौर रो विद्यालय आवंटन कर्यो जावेलां

0000

प्रधानमंत्री नरेन्द्र मोदी रो काल असम रा गुवाहाटी ऊं पीएम किसान सम्मान निधि री 22वीं किश्त जारी करण रो कार्यक्रम हैं ई किश्त रा तैत देशभर रा 9 करोड़ 32 लाख किसानां रा खातां मांय 18 हजार 640 करोड़ रुपया भेजा जावेलां केन्द्रीय कृषि अर किसान कल्याण मंत्री शिवराज सिंह चौहान आज नई दिल्ली मांय खबरनवीसां ने आ जाणकारी दीनीं

वे बतायो के पीएम किसान सम्मान निधि रा तैत हाल ताई किसानां रा खातां मांय 4 लाख 9 हजार करोड़ रुपया ऊं बत्ती रकम दी जा चुकी हैं श्री चौहान किसानां सारु चलायी ज्या एआई-आधारित डिजिटल प्लेटफॉर्म, भारत विस्तार रो जिक करता थकां कह्यो के इण ऊं किसानां ने वां री भाषा मांय फोन रे जरिए जाणकारी दी जावेलां

000

प्रदेश मांय रसोई गैस री कमी रा बारा मांय शंका अर अफवाहां दूर करण सारु जाग जगावण रो अभियान चलायो जा रह्यो हैं जिलां मांय कलेक्टर गैस टर्मिनल रो दौरा कर र व्यवस्थावां अर हिफाजती इंतजामात रो जायजो ले रह्या हैं गैस री पूर्ति माथे लगातार निजर राखण सारु जिला स्तर माथे कन्ट्रोल रूम बणायी ज्या हैं पाली रा जिला कलेक्टर एल एन मंत्री वीडियो संदेश रे जरिये कह्यो के जिला मांय रसोई गैस जरूरी तादाद मांय मौजूद हैं

.....

इण ऊं पैली मुख्य सचिव वी श्रीनिवास रसोई गैस री टंकियां री पूर्ति रा काम माथे निगरानी राखण सारु राज्य अर जिला स्तर माथे निगरानी समितियां बणावण रा हुकम दीना हां वे सगळा जिला कलेक्टरां ने पुलिस रा हेल्पलाइन नंबर 112 माथे रसोई गैस री टंकियां री कालाबाजारी ऊं जुड़ी शिकायतां माथे तुरत कार्रवाई करण बाबत ई कह्यो ग्राहक हेल्पलाइन नंबर 181 अर 14435 माथे ई ई बारा मांय शिकायत कर सके हैं ई बीचे तेल कंपनी इंडियन ऑयल कार्पोरेशन लिमिटेड सोशल मीडिया पोस्ट रे जरिए भरोसो दिरायो है के देश मांय तेल री पूर्ति लगातार करी जा रही हैं कंपनी रे मुजब आखा देश मांय वां रा पेट्रोल पंप चालू है अर पेट्रोल, डीजल अर दूजा पेट्रोलियम उत्पादां रो पर्याप्त भण्डार मौजूद हैं कंपनी ग्राहकां ऊं अफवाहां माथे ध्यान नी देवण अर पेट्रोल पंप भीड़ नी करण री अपील कीनी हैं

000

चैत महीनो आवण सागे ई प्रदेश मांय गर्मी रो असर बधबा लाग्यो है अर पारो सामान्य ऊं 5 ऊं 7 डिग्री सेल्सियस ऊंचो दर्ज कर्यो जा रह्यो हैं मौसम विभाग रे मुजब घणखर ठौड़ां दिन री बगत तापमान 35 ऊं 40 डिग्री सेल्सियस बीचे चाल रह्यो है अर केई ठौड़ां उन्नो बायरो बाजण लाग्यो हैं लारला चौबीस घंटा मांय 40 दशमलव 8 डिग्री सेल्सियस तापमान सागे बाड़मेर राज्य मांय सब ऊं उन्नी ठौड़ रह्यो मौसम विभाग आवता 48 घंटां ताई मौसम सूखो रेहवण अर पारो थोड़ो उतरण रा आसार जताया हैं महकमा रे मुजब 14 अर 15 मार्च ने कटे-कटे हल्की बरसात व्हे सके हैं महकमो गर्मी ऊं बचाव सारु पीवण री चीजां बत्ती काम लेवण सारु कह्यो हैं किसानां ने खेतां मांय संवारे अर सिज्यां री पोर पाणत करण अर ढांढां-ढोरां सारु खास व्यवस्था करण बाबत् कही ज्यो हैं

000

दांडी यात्रा दिवस रे मौके आज दांडी यात्रा मांय भाग लेवण वाळा सत्याग्रहियां ने सिरधाभाव सागे याद कर्या जा रह्या हैं साल 1930 मांय आज ही रा दिन महात्मा गांधी गुजरात मांय साबरमती ऊं दांडी ताई पैदल यात्रा कर र नमक कानून तोड्यो हों दांडी यात्रा ऊं बापू संकल्प री ताकत सब ऊं मोटी व्हेवण रो संदेश दीनो हों मुख्यमंत्री भजन लाल शर्मा दांडी मार्च मांय शामिल व्हेवण वाळा सगळा वीर जवानां ने सोशल मीडिया पोस्ट रे जरिये श्रद्धांजलि दीनीं प्रदेश मांय दांडी यात्रा दिवस रे मौके केई कार्यक्रम राख्यी ज्यां कोटा मांय केन्द्रीय संचार ब्यूरो री ओर ऊं सरकारी कॉलेज मांय खास कार्यक्रम राख्यी ज्यो, जठे विद्यार्थियां ने दांडी मार्च रा बारा मांय जाणकारी दीरीजीं पाली मांय गांधी चौराहा ऊं साइंस पार्क ताई शांति मार्च निकाळी ज्यो अर संगोष्ठी राख्यी ज्यीं

000

मुख्यमंत्री भजनलाल शर्मा रो 16 मार्च ने डूंगरपुर जिला रा बेणेश्वर धाम रो दौरा करण रो कार्यक्रम हैं वे जनजातीय गौरव दिवस रे मौके राख्या जावण वाळा कार्यक्रम मांय शामिल व्हेलां वां रा दौरा रा कार्यक्रम ने ध्यान राखता थकां आज जनजातीय विभाग रा अतिरिक्त मुख्य सचिव कुंजीलाल मीणा अर संभागीय आयुक्त प्रज्ञा केवलरमानी समेत अहलकार कार्यक्रम री ठौड़ रो जायजो लीनो, व्यवस्थावां देखी अर जरूरी हुकम दीनां

000

प्रधानमंत्री नरेन्द्र मोदी आकाशवाणी ऊं हर महीना प्रसारित कर्या जावण वाळा खास कार्यक्रम “मन की बात” मांय 29 मार्च—दीतवार ने विचार बतावेलां आ ई कार्यक्रम री 132वीं कड़ी व्हेलां ई सारु आप ई मुफ्त नम्बर 1800—11—7800 माथे 27 मार्च तांई राय दे सको हों विचार नरेन्द्र मोदी एप अर माय जीओवी ओपन फोरम रे ज़रिए भेजा जा सके हैं

000